

永平府志卷之十九

萊陽宋

琬遺次

府學訓導徐

香叅訂

蕭山張朝琮續纂

盧龍教諭胡仁濟校輯

人物中

永平自漢迄元秀孕山川代多英傑萊陽宋公於前卷已詳誌之若夫有明三百年間時有盛衰而豐功美蹟可垂不朽者復難更僕數繼萊陽而珥筆不能辭續貂之責矣爰按其世次詳加考核并於前卷遺略者仍補其闕彙成一編以見名區所鍾歷久猶新勝國之奇不減往昔是邦之人覽先德而惕勵振興以弗墜其家聲焉未必非鼓舞風教之一助云

永平府志

卷之十九

一

遼齊陶馬城人純孝至性孚於里閭壽昌間徵授石城令遷明威將軍

金吉士寬尹吉甫裔也南漢太守格之後五代徙居灤州宜安里事親最孝富而好施贈昭勇大將軍

李杭樂亭人天會初登進士時平灤兵戈甫定民未知學公擇城東南隅勅立聖廟歲時祭享以倡明聖教維風振俗徽猷甚遠仕至刺史有聲於時

任詢灤州義豐人正隆二年間授進士嗜詩書其文章行實載中州集善書法作真草隸篆氣完力勁世寶傳之歷北京監鹽使

葛弘灤州梅二里人金末歲饑竭力贍卹全活數百人元辟爲石城縣尹

元鮮于仲權樂亭人太祖十年登進士博學好古以道義自重時樂亭無學舍權慨然倡義增建黌舍設立學館汲引後學人皆知以禮義自閑數年之間文物彬彬稱盛弟仲畢官昭信校尉

永平府志

卷之十九

二

任伯仁灤州人南麓六世孫讓產于弟伯義伯禮孝友出至性元貞中授銀符進義副尉武衛親軍百夫長

路進興字通舉灤州人大德間隨伯顏破賊不避矢石累獲大功受勅牒印綬賜敦武校尉辭歸奉母務盡菽水之歡母卒體粥縞素哀毀踰禮鄉人以孝稱焉

張晉宋橫渠五世孫歷官睢州防禦使太宗六年賜第於燕并食邑於灤見灤北有橫山追思其祖榜曰橫雲清逸築橫渠書院於城東南隅弟智爲王府叅謀

張德灤州人宋橫渠七世孫皇慶中登進士授本州學正

文章學行足世其家

李彥忠盧龍人性至孝父喪廬墓八年足跡不至於室至治中旌表

楊紹先樂亭蔡家莊人由進士至正中爲集賢院司直學士德行文章爲世推重嘗集書三百六十三部賫藏本縣學庫備邑弟子員及民間俊秀參考博覽子塾仕至濟南路厭次縣尹善篆書不墜家聲見邑廟學碑

崔煜遷安人事親以孝聞至正中任遼陽行省郎中值程思忠作亂據永平剽掠鄉民煜領兵保障之後官至叅政

永平府志

卷之十九

三

明高德撫寧人洪武初歸附從征累立戰功除授副千戶十四年奉調征雲南金齒衛等處所至奏績十五年八月進攻阿白寨奮勇爭擊力戰死之及雲南平事聞詔封明威將軍都指揮使世襲指揮僉事

宋弘道樂亭人少值元季隱居不仕講授經學於鄉家業泊如入明開科遂登洪武乙丑進士拜監察御史有聲尋遷河南左叅政以衰老乞歸琴書衣裝惟一輓輅而已後起左僉都御史未就年七十餘卒于家

習成盧龍人洪武中以材能擢用歷湖廣按察僉事

溫原樂亭人洪武中薦辟入仕歷職勤能官至都察院左  
僉都御史有聲載一統志

李樂樂亭人洪武中貢入太學永樂間拜監察御史有激  
揚聲遷山東按察司副使卒後有行部者至詢樂得其子  
茂貧甚捐俸助之俾就塾則其品望可見矣子茂正統間  
貢仕至高郵知州茂子珏成化間貢任州判官

龐遵盧龍人母病腫三年不起思食魚遵求于市不得悲  
嘆而歸行河畔忽有魚躍舟中乃取作羹母食而病痊

史怡樂亭人貢士永樂初遼東軍亂入關怡守城有功授

永平府志

卷之十九

四

戶部郎中歷江西左叅政

趙忠盧龍人永樂甲午舉人任御史改刑部郎中致仕以  
行誼爲鄉飲賓曾孫得佑三歲失恃長爲諸生遭隣人橫  
逆而讀書自如人服其雅量登嘉靖癸未進士甫三月授  
陝西道御史巡按應天掌南京畿道嚴察蘇松等府案牘  
及糾劾輔臣羣黨側目外轉貴州僉事未幾以邊材調遼  
東再調山西兵備分巡冀南道轉貴州畢節道陞山東叅  
議分守遼海東寧道陞陝西副使備兵肅州其在貴州却  
金而服蠻苗及撫哈密酒泉頌之陞陝西行太僕寺卿致

仕歷任二十七年以清介終林居泊然宅第敝甚郡守紀公巡以罰鍰置瓦葺于城廂將爲葺之得佑聞而艱然曰得佑薄宦時無敢取一介恐虐地方今顧累及桑梓邪壽七十三卒

王翺字九臯灤州人登永樂乙未進士授翰林庶吉士乙巳改大理寺左寺正又改行人宣德初遷監察御史十年陞僉都御史巡撫江西正統七年提督遼東軍務法明令嚴陞左都御史景泰三年加太子太保總督兩廣尋陞吏部尚書銓察信度天順八年加太子太傅卒年八十有四

永平府志

卷之十九

五

爲人剛方廉儉隨所任歷多追慕焉

崔碧昌黎人登永樂戊戌進士官至御史持躬謇謇綽有能聲

邵儼盧龍人永樂癸卯舉人石州同知陞南京戶部郎中歷陝西右叅議文章政事鄉邦所稱子瑄歲貢知朝城以行誼著父子祀鄉賢曾孫鶴年嘉靖戊子舉人知岢嵐州謝政屢空有祖父之風云

麴祥字景德盧龍人永樂初侍父百戶亮調任金山年十四被倭擄久轉商日本其王知中國人召見之留侍左右

改名元貴因得力學遂爲土官畜妻子然心未嘗一日忘鄉土也屢諷主入貢宣德中與使臣抵京上疏陳情臣夙遭擄抱釁痛心死生路梗流離困頓辛苦萬狀生還中國夫豈由人伏乞賜歸省侍上柔遠方隆不欲遲留之遣令還國許給驛暫詣金山至唯母存耳母曰果吾兒則耳陰有赤痣驗之信然抱持慟哭悲動隣里咸歎異爲再生未幾重違上命別去祥至日本啓以聖意番王允之仍令入貢申請前詔許襲職歸養祥母子相失幾二十載又有中外之限得遂初志難矣祥事母備極甘旨聞言及父事輒哽咽不已後母寢疾三載朝夕扶持不離左右及卒哀毀骨立衰經三年祥博覽經史通左氏春秋善吟咏年八十餘以壽終

永平府志

卷之十九

六

王銳遷安人正統己未進士由知縣歷官都御史任事有擔當不爲勢怵巡撫延綬值叛兵構亂銳率衆討平之叙功廕子世襲錦衣衛百戶

張文質昌黎人登正統壬戌進士謹厚有容言笑不苟官至禮部尚書加太子少保

趙玉遷安人正統甲子舉人初知山東高唐州在任九年

著有治績陞漢中知府亦歷九年吏畏民懷政無不舉致仕家居十年平心率物鄉人推重焉

李和遷安人正統乙丑進士歷官河南叅政清慎詳密聲望丕著

李霖樂亭人正統丁卯舉人授柘城令考績贈父昇如其官尋陞衢州通判義方訓諸子復以子貴封主事長子宗夏弘治乙卯舉人在邠州學正仲子宗商字尙質登弘治庚戌進士性沉靜寡言笑嗜學授戶部主事歷員外郎中陞陝西行太僕寺少卿有操守謫兩淮運同執持不變以

永平府志

卷之十九

七

休致歸季子宗儒勤勵好學伯仲相繼科第儒醇謹誠慤溫恭抑抑略無矜炫色貢入太學授林縣丞亡何棲遲丘壑益褻躬睦里爲鄉邑望者幾四十年嘉靖間扁其名于旌善亭年九十七卒

沈禮字大用灤州人正統丁卯舉人任淮安別駕奉親至謹喪祭不用浮屠禮化成俗

劉永字致遠灤州人性嚴毅剛正以明經初令莘縣釐刈弊蠹英聲特達遷守泗州勲戚豪右畏其介直不敢干以私境內肅然

劉宣江西吉安人戊盧龍衛以春秋應景泰元年鄉試侍講劉鉉主考定爲第一人同考者欲更鉉爭曰朝廷立賢無方不可乃止次年殿試第二甲授編修累官至南京工部尙書名德爲時所推重

陳恕字達道灤州人生平廉介好施爲諸生時值歲饑民輸輓郡糧苦偏涼汀道險以資興銀傭工鑿爲坦途至今稱便登庚午鄉薦任開封郡丞子民下士折獄立斷嘗遇數人若貴游者曰此巨盜也邏其實果然咸服其神致政歸泣送者遮路行李蕭然有司重其廉有贈遺卽市鐵鑄永平府志

卷之十九

八

文廟祭器居鄉謹厚喜怒不形恤笄贍孤以純德稱唐福東勝左衛世襲指揮中景泰庚午舉人孝友慕義歷知隨濱通三州有清白聲嘗鑄祭器供聖祀加四品服俸九年考滿陞萊州知府未任卒祀鄉賢繼妻張氏年二十四遺腹子調例宜襲職族人爭之張籲天曰得存此息奉烝嘗足矣讓而撫調由歲貢任學正

田紳樂亭人庠生景泰初以親老陳情於督學使者求侍養父歿哀毀踰禮旣葬自跣足負土母終亦如之有司請旌未果百年來封土歸然可望數里



李勝永平衛人登景泰辛未進士授御史陞河南按察僉事發摘如神訟無冤滯

周斌昌黎人登景泰辛未進士授御史劾忠國公石亨驕恣不法調江陰知縣多惠政陞開封知府未幾轉陝西叅政軍民遮道攀留白於提學副使劉昌記其遺愛官至湖廣布政

馬麟呂信俱盧龍人宋會董全周清楊玘俱遷安人許敬撫寧人高信興才震俱昌黎人姚清徐俊石敬俱樂亭人景泰三年值水旱大饑各輸粟八百石賑濟

永平府志

卷之十九

九

萬信昌黎人以明經任開封知府有異政詳皇明一統志祖述昌黎人以明經授嘉定知縣公廉謹飭歷官福建右布政

杜謙昌黎人幼失恃事繼母甚謹不拂父意人以孝狀元稱之比長登景泰甲戌進士官至工部侍郎廉能經濟別歷有聲父祖皆贈侍郎

閻鶴字仲輔灤州人登景泰甲戌進士授監察御史巡按兩浙鋤權橫清鹽鑛風紀甚嚴人以閻羅目之謫廣西平南主簿陞山東諸城知縣操履一致卒于官著有直菴集

張泰樂亭人貢士景泰間授知桐鄉是時桐鄉新闢諸所未備泰至三載始有秋乃措置建樹六事修舉民不告勞俗多水火葬泰禁之購地置義塚他如闢險塞覈兼并招商賈皆可紀焉九年洊有成績陞開封通判

牛本樂亭人景泰丙子舉人授九江同知素性謙恭涖官廉慎有惠政九年將代郡人赴部保留卽擢本府知府楊珍撫寧人克供子職母蚤逝事父惟謹侍食侍寢無怠內外咸以孝子呼之父疾篤醫藥罔效口嘗其便泄以味甘苦知不能起遂治後事如禮父卒及葬廬于墓側負土築墳三年乃歸

永平府志

卷之十九

十

郁瑄其先崑山人祖彥忠明初任潮州同知徙樂亭父昌歲貢生瑄勤學勵行天順壬午領鄉薦授知縣瑄仲子昕歲貢任陵縣知縣季子時歲貢任儀封教諭居鄉長厚不浮時子從舜聰敏好學名藉甚歲貢授訓導齋志而卒金鏞撫寧庠生父禧蚤逝母高氏守制撫孤凜松栢操鏞性孝負米採薪勤于供養母恙卽憂見於色焚香祝天願以身代進食必先嘗其寒熱雖貧嘗奮志讀書由恩選官光祿寺署正乞歸終養母節子孝萃於一門

王貴昌黎人以明經授蘇州郡丞陞慶陽知府有德望祀鄉賢

宋銘昌黎人成化乙酉舉人任通許知縣仁恕清廉士民愛戴子孫繩繩人咸謂循良所致

盧敬其先山陽人徙定州元時又徙樂亭高祖和甫致和間聞於鄉父斌生敬嗜學領成化乙酉鄉薦授兵部司務侃侃不阿冰操凜著五載考最進階嘗語其子梁棐輩曰世有營利者爲子孫計耳竟何益吾厄一第子孫必有第者若曹勉之丁外艱卒家業蕭然仲子梁歲貢不仕以子

永平府志

卷之十九

十一

貴封右叅議梁長子耿麒字仁淑年十三入庠過目成誦弱冠登嘉靖癸未進士授工部虞衡司主事歷員外郎陞陝西僉事屯田甘肅給戍牛種丁內艱起補江西僉事洗數沉寃陞山西叅議比駐雲中當外叛甫平恩威並著卽強藩亦歛戢防邊有運籌功建修五堡世廟賜綸音有巨鎮賴以永安之褒復丁外艱起補山東叅議陞山西副使以疾卒年四十有五麒麟貌玉立性直方篤孝友父產悉讓二弟所居庭前無旋馬地尤博羣書詩造唐語著藍山集涖官所至以明敏聞然議論辨博長官前亦不少遜終以

此取忌於人君子曰樂亭自開科以來登甲第者四人麒實于明爭光焉天不假年惜哉

楊祥永平衛人登成化丙戌進士授宜興知縣陞戶部主事歷山西僉事清慎無玷

鄭巳字克修山海衛人天性穎敏成童充邑弟子員屬儷句輒驚人甚窘刻意向學寒夜燃薪誦書達旦用是博極群書登成化丙戌進士選庶吉士時劉文安公典教習每閱巳文歎曰山海乃有此子改監察御史會廷推撫臣弗當抗章論之又累疏指摘輔臣及中貴由此人多忌巳

永平府志

卷之十九

三

者巡按陝西值甘涼災沴邊境驛騷乃上匡時圖治等疏得舉賑濟飭邊備時有勲貴親弟怙勢凌下監司莫敢問捕而杖之幾死竟被累謫戍宣府其鎮總戎雅敬巳館諸佛宮士人受學者日衆有黠卒怨總戎誣以不道事累巳繫闕下上白其誣放歸孝宗踐祚詔復其官巳亮節有氣嫉惡如仇家居時談世事不平者輒攘臂憤惋至面詰人罔避以是弗亨于官云

吳思文灤州人輸粟救荒成化五年詔賜七品散官

王信撫寧衛人進士王胤祥之祖也成化七年大饑出粟

八百石賑濟

李福灤州人于成化七年爲義葬凡貧不能葬者舉之  
謝綱字廷憲灤州人登成化壬辰進士素以孝友稱任上  
虞知縣蒞政慈祥明決有質者一判兩服卒于官民皆望  
柩而哭

張廷綱字朝振永平衛人登成化壬辰進士授行人賜一  
品服使安南回太監汪直執送西廠獄未幾廠革各散去  
罷歸纂府志

郝隆字景昌灤州人登成化壬辰進士幼穎悟善記初官  
永平府志

卷之十九

三

大理評事歷左寺副右寺正陞金華知府政寬民悅修通  
濟橋立有碑在任九年致政歸進階亞中大夫

蕭顯字文明別號海釣山海衛人登成化壬辰進士授兵  
科給事中有武臣連中貴張大邊功希重賞顯批奏尾駁  
之直聲振一時會巫矯邪神煽惑復抗章劾之並請禁私  
創庵觀言極剴切留中不報一日召至左順門命中官面  
詰顯氣定語暢應對了了乃諭遣之又數日巫逐矣權倖  
愈疾顯居省中八年外遷鎮寧同知命下顯方對客作草  
書手闕報付其子趣治裝仍終數紙乃罷蒞鎮寧八年復

遷衢州同知又三年擢福建僉事所至皆盡心職業無厭  
薄意隨賚萬壽表入賀時刑部尙書白昂欲有所薦戚友  
亦樂爲之援不復顧戀竟乞休歸顯性醇篤不妄言笑尙  
義氣久而弗渝所著有海釣集鎮寧行稿其書法沉着頓  
挫傳播朝鮮珍重之

徐禮灤州人于成化十年施衣隆冬見無衣者輒施每歲  
行之不倦

魏琮遷安人登成化乙未進士爲烏城令以廉謹稱尤樂  
成就後進一時名士多出其門

永平府志

卷之十九

古

李時其先鳳陽人有御史公謫爲盧龍民子從義以靖難  
功爲永平衛中所試百戶五世至凱凱生時父產悉讓諸  
兄獨養老母中成化丁酉舉人知岢嵐州八年廉平多惠  
政民俗因財退婚曲爲解諭完聚吏卒餼者捐俸備禮以  
配之論財之俗爲變陞漢中府同知在任六年陞知平涼  
府持守不渝忤逆瑾改思州府又誣以前任庫藏不明落  
職追問踰年乃白補思恩軍民府行至南寧中瘴癘卒于  
塗時剛毅有治行所至吏民畏戴居鄉有厚德二子克濁  
克拙同中嘉靖乙酉舉人克濁字澄之丙戌登進士知葉

縣收黃山巨寇民爲立生祠與楚葉公漢王喬爲三令祠擢爲禮科給事中屢上封事歷左右都六年陞浙江右叅政改補河南修築隘口自順德界抵山西延亘九百餘里陞陝西按察使辨官室子弟五人積寃陞河南右布政轉左尋改貴州賑銅仁荒歉活萬餘人募民以備苗變罷歸于城北營萬柳莊結故人爲飲社長子瀹字伯通處世闊以謹儉稱由歲貢授郟城縣丞刻稱難治民流稅逋瀹于荒田立官莊捐俸創廬舍三十餘區號爲俸餘官莊買牛給種招集逃民耕墾收穫足公稅及傭值外餘入義倉備

永平府志

卷之十九

五

賑公私稱便民亦復業銓部廉其賢擢知刻城未踰年辭官歸克拙字逸之知陳州俗刁豪猾戀公門恩文檄以擾害鄉民號爲掛搭羅織久莫能去下車訪首罪杖殺之餘衆悉逃散尋以母憂去補知南通州政平訟理卒于官克濁夫人張氏有壺範其女適撫寧舉人周良臣無嗣以繼室撫先女與妾某氏相守三十餘年其女適盧龍衛指揮焦承勳年二十餘守遺腹孤皆足重其家世云

王永清遷安人成化丁酉舉人知陽武縣尋改延津爲政務尙德化不事鞭朴民愛戴之

才寬遷安人登成化戊戌進士由縣令歷郎署太守方伯都憲轉工部侍郎以不附閹瑾出爲陝西總制加工部尚書軍法甚嚴部將怯懦輒巾幘耻勵臨陣躬親督戰奮不顧身遂遇害上爲輟朝哀悼諭祭贈太子少保謚襄愍仍廕子世襲錦衣衛百戶

王和遷安人登成化戊戌進士歷南北道御史論劾戶部尚書張鳳西廠太監汪直聲動朝野外轉山東海道副使巡海中瘴卒于官生平廉介剛正卒之日貧不能殮廉憲陳公璧賻以百金始得歸葬

永平府志

卷之十九

去

高璉字潤之灤州人登成化戊戌進士性方嚴謙退篤孝友耽墳典試南官不第進太學聞見閔肆及登第尹臨邑勤政廣積值歲大稔民多濟活暇卽試士請業門下者多登仕籍焉三載政成遂罹疾卒時囊無數金幾不能殮云田增字大年灤州人性聰敏剛直嗜學寒暑不倦以詩經中成化庚子鄉試尹鳳翔禁奸除暴任六年告歸年八十卒

周建撫寧衛指揮僉事成化十六年官界嶺駐操營事三月鹵入寇叅將王宣督令截殺至白石店奪回被擄人畜



燒敵車輛回至椴木嶺伏賊突出前賊復回夾攻戰劔賊欲取建甲衣喝令脫不從猶以刀傷賊臂群怒爭刃之事聞詔加實授指揮同知世襲

余璘字廷潤灤州人登成化辛丑進士力學甘貧登第時年六十一授行人陞南京員外郎卒于官

杜源侍郎謙長子登成化辛丑進士歷青州知府有廉能聲內行修謹置義田以周族姓

杜漢侍郎謙季子以蔭至南康知府宅心渾厚鄉里推重楊潤盧龍人成化癸卯舉人任華亭教諭陞知金州剛方

永平府志

卷之十九

七

廉介德政著聞

馮清字士潔灤州人親喪廬墓三年手植松柏百餘株踰年繁茂里人歎異登成化癸卯鄉薦爲郿縣令慈義兼施獄有冤囚力爲詳豁後持金馬以酬揮之不受曰滌爾冤者國恩也何謝時以廉孝先生稱之

郭鏞遷安人登成化甲辰進士授金華推官平反詳允郡無冤獄倡修通濟橋用資利涉考選授御史巡按宣大遼東糾劾權貴綽有直聲轉山西副使督修邊墻節省糧耗軍民稱便勞瘁卒于官囊無一資時稱清介

朱輝廬龍庠生母程氏亡晝夜號泣哀毀骨立廬墓負土成塚及期白狼馴擾不去有燕巢廬下而乳十子並穀雙岐之異撫院給近墳山塲環五里許官爲植樹成化甲辰題旌以歲貢爲任丘訓導

王用字尚賓灤州人性聰敏成化丙午舉人始仕桃源令以內艱歸補任西平釐革冗費凡不便于民者極力去之兩邑至今稱賢

王淵燕河營人幼喪父其母陳氏守節至七十餘卒淵廬墓三年日三抔土至今高塚巋然

永平府志

卷之十九

七

朱國賢宋德詔蕭大用俱廬龍人各以廬墓奉旌

安民字修已灤州人弘治己酉舉人授兵部司務歷戶部郎中清慎練達嚮用未衰乃引疾乞休加正四品服色歸初父和尹大同客寢民幼扶櫬還事母周氏曲盡懽愉母終築廬于村慟毀三年未嘗近帷室鄉人稱孝焉

高謙字天益灤州人登弘治癸丑進士性剛直不苟父早卒力本勤學事母不曠定省撫弟詳甚友愛初拜丹陽令迎母許氏偕往竭力承事務得懽顏邑庠隘乃拓學基崇殿廡講授經術又建津梁創倉宇議賑貸百度維新士人

勒碑頌之陞青州同知轉刑部郎中操履清介陞平涼知府未幾調鞏昌逾月而卒大志未遂惜哉

王廷遷安人登弘治癸丑進士授兵科給事中歷山西僉事才德爲時所推

許莊字德徵灤州人登弘治癸丑進士初尹臨汾內艱服闋復尹寶雞俱有聲遷平陽同知民有廉幹之頌陞山東僉事轉陝西叅議爲人卓犖博學喜著述有康衢文集梅花百詠心鑑警語諸作

李金遷安人登弘治癸丑進士任戶部郎中奉命勘貴戚

永平府志

卷之十九

十九

田土不附權勢孝宗書其名于御屏陞德安知府賑荒汰冗民甚德之會有疑獄禱神示夢得其情歷官至山東憲副直道不容于時浩然解組歸杜門教子

李秀興州衛人弘治乙卯舉人事繼母孝歷知平原齊河諸城三縣政務愛民善決疑獄陞廬州府通判

孫爛遷安人登弘治丙辰進士歷陝西苑馬寺卿峭直不附權貴

王春撫寧人登弘治丙辰進士授翰林院檢討侍壽王講出邸遷春左長史日以善道開悟有所陳對必云尊天子

守祖宗法度孝宗嘉之賜正四品服庚申改周府左長史  
王在幼冲啓廸如在壽邸將婚汴之巨室有賄謀爲元妃  
者春發其奸別選當嗣爵庶兄託內使行金錢于春謀奪  
嫡春正色叱之遂寢乙亥王以春輔道勤勞奏加三品服  
庚寅力求去嘉靖丙申卒

任惠字濟民灤州人登弘治丙辰進士授行人兩使周藩  
考績有聲遷南京吏科給事中以彈劾太監高鳳革爲民  
後詔旌忠諫

王蕃字邦憲灤州人登弘治丙辰進士由博士陞御史立  
永平府志

卷之十九

三

朝審諤不容人過嘗劾逆瑾彈媚臣陳晦等專勅切責移  
疾歸里幾數十年起守平涼又以中忤罷歸有雪屋詩集  
李炫遷安人幼而好學冬夏兀坐一室登弘治己未進士  
歷甘肅行僕卿河西叛將煽亂炫匿民舍中示方略而戢  
之事平誣執甚衆炫讞鞫多全活致政二紀課子耕讀足  
不至官府

朱鑑字緝熙其先揚州海門人永樂二年遣富戶實北邊  
遂僑居盧龍之北鄉從遷者八戶因名其地曰八家寨始  
祖自名再傳至善生有節鑑父天性孝友坦直積粟三千

斛嘗貸嫻隣不取息鑑登弘治己未進士授刑部主事正德中劉瑾擅政舉朝獻媚者十之九鑑處之坦然正直不阿陞員外郎中出爲建寧知府居官嚴明果斷不受囑託郡人有神明之頌以母憂歸服闋補青州知府在任五載其治如建寧致政還家村居不事交接居左建一小樓門前有井婦女非裙裳不敢至井汲水壘中皆以禮自制嚴憚之如主彥方云子三伊廩生似早卒侶以貢爲肥城訓導年近七十手不釋卷經書歲一週覽通鑑子史無不徧涉子文運萬曆己丑進士任丹陽知縣勵精撫字政簡刑

清邑紳大司馬姜公欲改運河於城外以興貿易運恐勞民固執不從後五年考績稱最竟遷南戶部主事時人爲之不平至任六月奉差入都因歸省母卒于家子方九齡宦橐蕭然繼室李氏課子治家不墜先業子濟美廩生孝友篤行庚午之變遂謝功名凡三教六壬醫卜之書無不兼通

王珩字汝溫永平衛人登弘治己未進士授兵科給事中督工泰陵中使董役者剝削軍士伐近陵山木代薪以規利劾之伏辜陞工科左給事中徽州有豪族爭訟數年不

決命勘遂得情改御史覈應天諸郡公藏知府某不職懼  
得罪密以金餽卽發其贓私罷之陞刑科都給事中武宗  
鋪宮奏省費數千金以濟邊餉陞順天府丞歲荒餓殍載  
途竭力賑活甚衆陞都察院左僉都御史提督雁門等關  
兼巡撫山西裁宗室驕橫以法權要規鹽利者峻拒之閩  
境肅然會敵分路入寇督兵禦之寧武關將吏以逗留失  
利劾其罪械繫京師因自劾并三邊撫臣俱左遷尋降浙  
江左叅議豪民有匿租數十載躬履畝得數百頃爲公稅  
孝豐有作亂者遠近騷然衆議調兵勦之請先往至卽解

散陞河南右叅政分守南陽捕浙川礦賊乃別脅從若干  
值盛寒多凍餒死悉活以粥遣之陞左僉都御史巡撫山  
東擇有司布各郡審編戶則以均徭役王師討逆濠道經  
齊魯籌芻糧供億兵皆無敢犯者及六飛南幸有司預集  
夫役數萬候境上疫作且乏食第令及期無誤悉散歸活  
者不可勝計鎮守指以供御大肆科索珣正色責之欲擊  
以笏乃止陞右副都御史巡撫陝西秦中宗室蕃衍祿每  
不給爲有司累令多方務積折補其數上下稱便河湟黠  
寇欲南下牧馬督固原將士嚴兵禦之遂遁歸略無所失

邊民安堵陞南京大理寺卿擢兵部右侍郎卒賜祭葬于城東蓮花源之原子二長道平廕國子生

王輔字良佐灤州人登弘治己未進士授行人兩使封藩陞南京監察御史遷河南副使時逆瑾向所司索天鵝絨布千疋無則折價各府歛解八萬兩輔曰此民膏血我甘鬲鑊不可從發回給民瑾因假會審鄧丙事謫輔陽城知縣遷戶部主事歷員外郎中復陞河南副使以疾乞休鄉人稱爲長者

劉甫樂亭人自明初至弘治間六世同居凡內外婚葬禮

永平府志

卷之十九

三

儀必均俱無後言己未巡按御史張黼嘉其賢命知縣田登旌異

魯鐸撫寧人登弘治壬戌進士授岳州推官陞大理評事會逆瑾擅權有黨繫獄鐸忤瑾竟抵罪謀中傷自分必死乃以他事謫河內縣丞瑾事敗轉沂水縣令陞刑部主事歷官至山東按察司分巡海道爲人多執法遠人服之

陳鶴遷安人登弘治壬戌進士勤儉明敏歷曹濮彬桂兵備副使臨陣躬帥斬獲甚衆

李士傑興州衛人爲諸生時聘陳氏女女後失明或勸其

更聘傑竟娶之人欽其義登弘治甲子鄉薦

張雲鵬山海衛人父病夜不假寐湯藥親嘗父歿敦古禮  
廬墓三年

翟鵬撫寧人登正德戊辰進士授戶部主事抽分河西務  
先至者往往以墨敗鵬至首革常例上不損國賦下深得  
商心遂見重於臺部轉員外郎出守衛輝府歷四年撫按  
以賢能薦者二十五疏舉卓異者三及入覲銓考天下第  
一時豫撫疏請改守開封蜀按疏保改守成都上竟從開  
封請鵬至開封遂有併包之謠撫按交薦迺遷陝臬兵備

永平府志

卷之十九

十五

洮岷轉按察使尋擢僉都御史巡撫寧夏地方有籌邊錄  
行於時諸凡釐奸革弊之政載于寧夏誌及全陝誌可徵  
也會總兵誣排賴清議東還至嘉靖二十年敵寇山西邊  
鎮失利守臣連疏告急兵部尙書張瓚及府部會推鵬請  
以原職奉勅提督北直山東河南等處軍務鵬至寇平復  
命還京陞兵部右侍郎兼右僉都御史總督宣大偏保等  
處軍務至議預請兵糧以禦邊警不時之患疏上不報革  
回籍亡何敵果深入復起鵬照前總督二十三年值犯邊  
督兵追剿斬獲甚衆捷聞晉秩兵部尙書兼都察院右副



都御使又設策生擒王三奪獲馬械華人拱手咸曰宣大數十年來僅有此捷也鵬天性慷慨有氣節多謀略故所至成功他如挫逆瑾之黨卻白爵之金修已廢之邊擒黠叛之首竒猷碩畫見於禮部侍郎閔如霖墓誌銘者甚悉也輓直不阿觀其惟有寸丹懸帝闕更無尺素達權門之句可以知所養矣竟以此被逮卒於京至穆宗嗣位追論前功始復原官加卹典賜祭諭葬

王念副使和之子登正德辛未進士部使欲爲立坊念以民貧謝寢之事母孝謹盡以先業畀兩弟知九江府脩復

永平府志

卷之十九

五

廢毀民不病役在程蕃奏開貢額使知向化居鄉廉靜足跡不入公府平居鼓琴遊咏居喪用家禮士大夫化之

馬永字天錫遷安人世金吾左衛指揮使父榮鎮番叅將永讀左氏春秋及兵法襲父官機警善騎射正德六年流賊起以督戰功陞都指揮同知江彬統宣府兵練西內永以千總隸彬稱疾不起彬強起稱病篤以故得脫彬禍十年守備遵化明年□入馬蘭峪塞殺叅將陳乾以永爲叅將守太平寨十二年□入塞戰栢崖堂再戰白羊峪斬首五十十三年陞署都督僉事克總兵官鎮三屯營尋署都

督同知簡閱諸軍散遣老弱聽其農市取其傭倍給諸健武者衣餉士皆喜人人奮習騎射當是時漁陽一軍稱雄未幾上至喜峰口欲出塞獵永扣馬諫上注視久之顧內侍曰此馬永耶笑而止朶顏酋把兒孫結諸口邀官賞不得輒入塞永迎擊洪山口大敗口斬首五十八陞右都督嘉靖三年把兒孫入青山口塞斬其驍酋遁去把兒孫自是效順保塞四年大同軍亂殺都御史張文錦叅將賈鑑用兵不利朝議用撫永上疏力言不可撫他日九邊效尤將有唐室河北藩鎮之禍勅永提兵出居庸討賊俄以流

言中止五年永上言乞宥諸言大禮獲罪者又言陸完有平賊功宜贖罪錄用其子奪總兵寄祿南京督府十二年大同再亂殺總兵李瑾討之久無功廷臣薦永召至業已撫罷兵復還南京十四年遼東軍亂逐都御史呂經召永總兵遼東十七年口入塞率兵五千人搗口巢焚其廬還十八年遼軍再亂率家兵逼賊斬四十餘人遂定陞左都督永卒于遼東遼人爲罷市哭喪過漁陽漁陽人皆哭兩鎮皆立祠祀之永爲將善誦口情先知所從來及衆寡設伏以待以故口往來失利去永善養士卒能同甘苦又善

知人樂拔蕭陞劉淵祝雄皆起列校爲方鎮

王道中撫寧人登正德甲戌進士授安慶府推官太湖人多避差有一人至縣卽令賠納蕩產傾家民苦最甚中親詣其地婉曲曉諭止令辦納已賦民甚稱便揚州知府孫某者爲御史張士隆劾奏贓私鉅萬朝廷遣給事中王俊民同御史陳傑會勘久之未決中一勘輒明時宸濠之變餘黨未盡當事者徃徃以平民誣作奸細收捕甚冤中查有贓仗旗幟止坐四人餘三百餘人盡釋之庚辰陞刑部主事嘉靖癸未轉員外郎甲辰陞鴻臚寺右卿旋轉左卿永平府志

卷之十九

三

十二年侍經筵敬謹如一乙未改大理寺右卿乙亥陞順天府尹辛亥卒著有黃齋集  
王翰昌黎人登正德甲戌進士授行人以直諫被譴卒贈御史諭祭有疏章存舊志

廖自顯字德潛盧龍衛人家貧力學以廉耻自持登正德辛巳進士知穎上賑饑活數萬人陞御史視通州倉革中官監收弊按宣大劾鎮將科歛及殺降冒功山西巡撫與叅議以小嫌爭忿劾而罷之嘉靖庚寅鎮守建昌太監缺疏請裁革遂更遊擊將軍至今稱便出按山東巡撫邵錫

清德藩軍校詭冒不從毆府卒乃劾其長史承奉官爲所  
中錫罷待罪出自顯知汝寧府二載持法不撓罷歸居家  
二十四年日與故人徜徉東郭蓮池芝壟間有拾燼集放  
言集憫遺集從徑際可進士獻可舉人不急仕進三十餘  
年銓知卽墨旋垂橐歸亦里中高士云

張文成遷安人正德中以吏員任陝縣典史時流寇猖獗  
逼城成奮身出戰多所斬獲總督彭公聞其才智檄領兵  
馬六千分路勦殺前後得首級千餘顆汝寧上蔡等路悉  
平功加三級邑人爲立祠舉入名宦鄉舉飲賓輿論欽服

永平府志

卷之十九

天

趙文舉山海衛人幼極孝母患疽痛不可忍醫皆云不治  
舉虔禱祝天願代母獲痊家甚窘居常奉母卽富者不過  
云

趙瑞昌黎人幼有才行于嘉靖壬午舉鄉試授河南伊陽  
知縣居官清介逸興飄然出塵俗負陶靖節操卒無遺金  
不能殮人皆痛惜

王庚字文祥灤州人登嘉靖癸未進士天資純篤寡言笑  
深易學後進多出其門三爲縣令有廉聲歷遷兵科都給  
事中慷慨敢言陞山西叅政按察使陝西右布政卒于官

李涵按察副使金之子孝事孀母以田產讓弟登嘉靖癸未進士爲戶部郎督兌運尙書稱爲廉吏知延安府除水患賑饑民備兵肅州脩嘉峪城軍民勒石記績補貴州兵備洗冤澤物民有天星之謠轉左布政擒首惡龍許保等苗民率服

闕傑盧龍人嘉靖乙酉舉人任荊州推官以治行行取陞石州知州遂辭歸耿介自好足不履城市者二十餘年

詹榮字仁甫角山其別號也山海衛人性敏學贍登嘉靖丙戌進士授戶部主事奉差權稅轉郎中督大同餉會癸

永平府志

卷之十九

三

巳軍叛殺主帥李瑾閉城抗師不下榮與武臣歃血計誅元惡不成期以闔門報國謀既定遂穴地達軍門報可乃示順逆激勸賊黨馬昇等擒首惡出獻事遂定班師侍郎黃綰御史蘓祐合疏聞于朝上褒嘉擢光祿少卿支從四品俸嗣歷璽卿太常卿轉僉都御史巡撫甘肅時大同總兵官周尙文與撫臣左廟議惟榮足以服之乃調撫大同榮與尙文處甚得其死力屢功進右副都御史居二年宗室光灼等通逆榮廉得其實先機發之械送京師隨遷兵部右侍郎邊工竣進俸一級值雲中警榮率將堵截退敵

召還本兵左侍郎會尙書缺擬推榮適中風輿疾歸未數月卒榮爲人忠信不欺沉毅有謀信賞必罰人爭効用萬曆巳酉孫廷赴闕請卹賜祭葬贈工部尙書

李光啓樂亭人其先李卜當洪武間戍陝西平魯衛後有功陞百戶世襲光啓性忠孝有才幹累陞京營都指揮使贈其先爲鎮國將軍歸祭先塋爲樹碑給族人衣陞宣鎮葛峪叅將嘉靖丙戌敵數突入侵苦居人啓憤焉一日警至率所部兵疾馳圍殲之未及爲陣敵四至大呼殺入啓被縛引去困餓不得死因給敵曰我爲帥第引我亭障下

當有贖者敵果引至亭障下啓罵曰爾宜殺我我非不肯死慮中國人疑我真降爾徒負辱國大罪幸毋贖我敵大怒遂支解之事聞詔立祠春秋祀焉見宣鎮忠烈傳

張世忠字顯甫別號平山山海衛副千戶忠貌不逾中人而神爽英發總髮時以世胄襲職嘉靖丙戌會武試登孫堪榜加授署指揮僉事尋掌衛篆遷秩守備天壽山歷陞大同中路叅將嚴整步伍矢立戰功調援有奇捷得實授正千戶緣邊事罣誤聽勘回籍未幾西隣告急本兵疏名上請特命移守偏頭關頻年失利人爲忠危之忠躍然曰

此吾報國之秋也嘉靖二十一年太原警忠與諸將分五哨進軟盟互援適遇敵于六支村忠麾下健卒僅千人挺身血戰自己至西矢石俱盡後援不至敵且增輕騎合圍射忠中額尋殪其馬忠猶跨牆對射矢透忠衣袖死之事聞賜祭葬贈右都督謚忠愍

韓梅字應元永平衛人嘉靖戊子舉人任大同同知六年廉平多惠有范驛丞死于官妻流落鬻女爲婢梅捐俸贖歸其母居家惇倫任質鄉黨稱之

高擢字士元灤州人登嘉靖己丑進士由博士陞禮科給事中建言侃侃得名諫議體歷副都御史風裁獨凜奉命提督操江苞苴絕跡晚鑿偏涼汀歸隱年九十卒

王鎬字宗周灤州人登嘉靖己丑進士擢御史時張桂以言禮柄用鎬獨正色不阿歷都御史撫寧夏屢奏邊功以忤時乞歸

王臣樂亭人父茂有孝行臣善楷書郡辟爲從事有罪人通路求道臣指天自誓郡守賢之每疑獄輒召與議能白人寃亡何奉母柩歸里山水暴至舟幾覆臣撫柩悲號竟無患若神助焉有客懷二十金欲糴粟入市遺金哭之悲

臣憐助之年四十七未舉子往禱泰山夢神告曰以吾二子與爾踰年生太守好學又三年生尙書好問若與夢符以二子貴累贈至南京戶部尙書長子好學領嘉靖庚子鄉薦嘗試南宮父卒痛爲肖像及令陳留蠲逋修學擢刺澤州佐歸德在在卓多善政及補太原弭盜祥刑請治宗室驕橫檄撫石州爲畫戰守之策歷陞戶部郎中督餉昌平時內使往來能正色戢之陞楚雄知府乞休歸著有遊藝集仲子好問生有異兆弱冠抱當世志舉於鄉卽郤儗金登嘉靖庚戌進士授太常博士時分宜當權廼泊然自

守久之方擢御史卽劾巨璫不法嘉靖末出按秦晉上與革便宜數事却諸祥瑞不以聞穆宗御極益多獻替而重孝思止行幸查內庫諸疏并劾近侍謀典兵柄尤極剴切遷大理丞歷通政使晉工部侍郎改刑戶二部擢南京右都御史拜南京戶部尙書憂時思職無一少替南中米涌貴例當改折問遽發倉粟而後以聞詔賑江南不待移文發賑曰奈何稽朝廷意以忍饑民有古大臣風先是爲卿貳時卽抗疏求退至是章屢上始得優免歸數月卒賜祭諭葬贈太子少保天性恬靜自奉澹泊立朝虔恭動由矩



獲謙抑折節若不勝衣而內實毅然不可奪鄉誼族範遐  
邇共孚所著春煦軒集三十六卷好問子渾然事親極孝  
閉戶讀書中萬曆辛卯鄉榜授中府都事歷刑部郎中時  
南康守吳寶因稅璫李道誣奏被逮然問擬還職上怒罰  
俸三月南康得以從輕徼生光妖言事東省無行老生流  
言彼中有聞者然恐蔓延無辜解發山東撫按鞫問保全  
大族甚夥陞馬湖知府革漆戶板稅修學繕城奢會爭殺  
片言力解總督王象乾題擢遵義兵備副使下議時疏請  
骸骨歸著蜀遊草尋卒窮約至甚十年後夙債始完

永平府志

卷之十九

三

蕭陞撫寧衛僉事累陞馬蘭峪叅將嘉靖癸巳大同內變  
結連北鹵兵部推陞以副將協守大同陞至兵事戒嚴內  
外不通陞詣督撫獻擣巢計以賊全部在內巢穴必虛督  
撫任之賊遂瓦解陞前軍都督僉事鎮守薊州卒賜祭葬  
劉淵山海衛僉事剛之孫剛視山海篆有名淵自三河黃  
花鎮守備入坐顯武營歷延綏遊擊宣府叅軍遷協守副  
總兵陞後軍都督僉事掛鎮朔將軍印改鎮薊州有名調  
提督西官廳聽征總兵官贈剛及父鎮官

祝雄廣寧前屯衛僉事調山海衛擢京營聽征叅將老營

游擊偏頭關副總兵陞後軍都督府僉事掛征西前將軍  
印鎮守大同改鎮薊州代淵善養士而樂爲用鹵入塞率  
子男爲士卒先子少却立斬以殉鹵望旗幟卽遁在鎮三  
年鹵馬不敢南牧名聞書于御屏廉靜自持奉客無兼味  
行邊布袍氊帽如行伍卒于官私囊僅足以歛薊爲立祠  
三人並起列校爲方鎮而皆屬衛職又相繼鎮薊前志稱  
之

張智遷安人由明經知遠定縣潔已奉公剗洗奸僞時修  
理學校政教大行有麥秀兩岐之瑞尋通判黃州民不忍  
永平府志

卷之十九

三

其去爲立祠號清張

蕭富樂亭人少孤事母孝母卒富供王事不在側歸而痛  
極嘔血終身言及淚泣泣下仲兄積私財富泊然絕不置  
齒頰竟以祖居讓伯仲而自居他所嘗爲府吏廉而有陰  
德旣歸省卽隱不仕嘉靖丁酉大饑鄉人求貸乃轉貸負  
累代償撫孤睦族重義輕利類此始艱嗣後連舉四子長  
雲漢博學工古文詞貢遊太學授大同通判累薦考最陞  
河東運同致仕歸贈富如其官

張文遂遷安人由明經知宜若縣尋調馬邑留心學校加

惠窮民士民德之

劉會灤州人于嘉靖十六年輸粟一千石賑饑

高漢樂亭人六世同居嘉靖十六年知府劉隅獎之

厲汝進灤州人登嘉靖戊戌進士授池州推官行取歷戶科都給事中劾柄相嚴嵩廷杖八十降典史穆宗踐祚錄其忠直

李思睿永平衛人由府學選貢知大同安定兩縣有惠政以侍養告歸閉門謝客教訓生徒足跡不至公庭

王榮遷安人由明經任榆林訓導未幾乞休居鄉友睦嘗永平府志

卷之十九

三

買人田人不忍舍輒還券無難色

馬鶴昌黎人以國學生授主簿性淳厚厭浮華清聲克著賈韶昌黎人以明經授瑞安主簿志行嚴謹六載卒于官民感德爲之立祠

郝宗啓字文卿灤州人隆孫嘉靖丙午舉人授博平知縣陞澤州知州學問深邃事親至孝居鄉勵行蒞政有聲

陳情字子孝灤州人嘉靖丙午舉人天性孝友見事明決隆慶元年令孝義有捍禦保城功迨令長葛宿松並著廉明且焚紅蓮七祖二百年肉身大得韓退之遺意慮州城

武備單弱造大炮十二位神鎗一百桿防守著有五行奕  
藪書行于世

陳舜撫寧衛指揮使任黃花鎮守備嘉靖二十五年三月  
敵入寇舜奮身率輕騎持短兵截戰敵衆我寡死之事聞  
詔加都指揮僉事

高玉灤州人貲頗富于嘉靖二十五年施義田并糧二千  
石周貧乏

陳慎灤州人孝義令陳情弟事母至孝營漏澤園共施地  
六畝于府君廟東北半里許

永平府志

卷之十九

三

溫欽樂亭人質朴篤實居平尙讓絕不與人競亦絕無過  
忒非遇審編戶徭不至公府既老亦罕至城市惟耕田明  
農而已貧而樂善卓有古人風年百有二歲猶耘踰年卒  
嘉靖間扁其名于旌善亭勸俗

蕭韶鳳山海衛人年十九父病蠱迎醫視之曰得樟柳木  
根可愈城中求之不獲或告以產于海陽時石河水暴漲  
不可渡韶直前往覓家人止之泣曰父病篤阻水而止于  
心忍乎竟涉至中流溺死三日尸浮于海君子重其孝而  
哀其愚

張懋勛山海衛人都督世忠子也痛父歿于王事每語及輒流涕事孀母三十餘年孝養備至母卒哀毀骨立廬墓如禮

馮恩孚樂亭人歲貢事親稱孝曲爲承順有老萊風父飲親故家雖隆冬深夜必俟父還然後寢母性嚴刻孚略不違意待人謙和無忤未仕卒

王永昌樂亭人家富好施能周人急鄉人稱貸有以田廬爲質多負而私轉鬻昌不與競又嘗捐地爲義塚其輸粟輸金輸工役以佐公家者不勝紀

永平府志

卷之十九

三

齊宗堯昌黎人由明經知汾州愛民教士積有善政至隆慶丁卯以城守功陞運同長子鳴鳳亦以明經知自在州清廉有爲剛介不阿嘗師邑侯孟秋講良知之學次子鳴雷以明經任林縣知縣孫士斌以明經任靈石知縣陞吉安同知以城守功進中憲大夫世德醇厚鄉邦稱之

張自鎬樂亭人歲貢性謹厚事親最孝母多任性鎬每幾諫久亦感悟邑宰陳留李公廉其賢延訓其子毫無干請齋志以歿鄉人悼焉

王尙賢行人翰之子性孝友堂弟郎中尙直乏嗣以次孫

承祧而不利其產居鄉恂恂仁恕因號恕齋由明經知富平縣有名及歸囊橐蕭然不異寒素孫之屏登萬曆辛卯鄉薦人以為積善之報云

馮餘慶灤州人由明經授西華令一塵不染捐貲千金建長橋於治郭利涉歸施義田用濟貧族以孫運泰貴贈罔卿

劉復禮字曰仁號任齋山海衛人嘉靖壬子舉人坦易謹飭宰長子縣刺渾源州遷冬官郎守保寧郡歷有異政罔卿寧夏預知李拜反默為防備尋丁艱致政歸依居舊廬永平府志

卷之十九

三

泊如也幼以孝聞暮年與季弟同爨每舉箸必呼弟他往必輟不食季弟有子口授而教之亦成明經里人有修鄰者質成譬曉之皆愧服

蕭大謙字民服號益齋僉事顯之孫質樸守清屢空微不介意遊成均時嘗拾遺金待還其人後領嘉靖壬子鄉薦令懷仁秦安皆耻結納專意實政士民懷其撫字而當道志其無餽遺竟取忤罷歸行李蕭然至不能充食指處之自如年八十有一卒世謂廳事容旋馬薄田供餽粥今昔侈為美談如大謙自海釣歷宦三世草舍僅可旋蝸瘠田

猶不充爨者顧不愈稱難耶

魏琦遷安庠生嘉靖三十六年兵變琦率鄉人保守兵至琦手刃二人既而衆兵群合遂被執琦罵不絕口而死當事大加嘆異命有司周恤給葬焉

王大用東勝衛人登隆慶戊辰進士授扶溝知縣執法無所阿當路啣之左遷東平州判陞滕縣令明習吏事每事必探弊端有大璫進貢折辱驛官索乾沒大用詣郵亭令開篋驗之皆胖襖遣人收捕其解戶于獄大璫甚懼求免其明練肩事類如此陞大理寺評事改戶部郎中歷官遠

永平府志

卷之十九

三

東陝西叅政

王胤祥撫寧人登隆慶辛未進士任偃城令吏治澄清恩威並著縣前苦水井化甘泉咸謂善政之感行取刑科給事中激揚盡力條陳九邊要務當宁嘉納之因劾江陵奪情外轉河南僉事進四川叅議後轉陝西副使當事特薦者凡二十餘疏以親老力辭杜門終養壽至八旬而終

王槐昌黎人由儒士工書翰任中書歷工部左侍郎清慎正直不阿權貴世廟嘉其忠贈祖父如其官

王華都御史銳之曾孫隆慶間輸磚十萬塊灰五萬劬助

修縣城至萬曆十五年大饑輸粟八百石助賑

侯顯昌黎人國學生尚氣節敦朴素父母雙亡俱廬墓側鳩巢于舍芝生于塚

孫渤昌黎人幼喪父事母最孝母死廬墓哀毀如禮

汪可詔昌黎人由明經任鞏昌府推官蒞政嚴明陞臨洮府同知

傅夢良山海庠生性純篤事母孝母歿哀毀如柴既葬廬墓側秋夏霖雨累日穴水盈尺不爲動

劉思誠字性之號定宇山海衛人萬曆癸酉舉人英資卓  
永平府志

卷之十九

罕

識廉直公平領鄉薦十餘年毫無請託筮仕平原審編徵賦設法神速隣邑皆效法之救荒能預理訟稱平費宮後有深壑數科荒落特爲築建五桂祠月課子衿于中伏臘不輟以是蜚英振起貧生婚葬不舉者捐橐助之招撫流遺蓋官房百餘間于郊外剏立集市墾田十餘頃藉以爲生方春躬行勸農力舉實政遷濟南同知署篆年餘吏請盤庫恩誠斥之其支領俸工俱以原封出給不除其耗有鹽商犯科以嬰貯銀二千兩冒託餽酒當堂碎嬰解入府庫竟無赦當道議派民徭思誠勃然色變議遂寢終以忤



貴拂衣歸思誠事母孝飯必待側舊產盡讓弟饒有孝友  
風

韓應庚字希白東勝左衛人世有隱德曾祖文富而好施  
祖誠益大其業嘉靖中歲屢歉先後貸鄉人粟至二萬石  
不責其償父廷義生而英敏通百家衆技嘗擒巨寇以靖  
一方封監察御史三子應庚其長也少勵清操登萬曆丁  
丑進士授彰德府推官其治務廉明寬厚下車取沈獄驗  
問數日間決斷殆盡受領新訟遣當直設竈公署前呼對  
簿者自炊未及餐而事已判矣平反冤獄無計入爲福建

永平府志

卷之十九

罕

道御史出按甘肅直大稜不俟命卽發倉粟以賑再按山  
東鋤強豪黜貪墨共出死囚二百六十餘人時年四十七  
卽引疾歸日與親故徜徉山水間于城南二十里石磯上  
築室名曰釣臺以圖書花鳥自娛七徵不起從不干有司  
遇不平事輒爲代白聞者敬信昭雪罔敢後歲甲辰饑輸  
粟公府而施糜掩骼無虛日又鬻負郭田數百畝以贍郡  
邑兩庠貧士至今咸食其德壽七十有四至今東輔推急  
流勇退者皆稱西軒先生爲第一人子二原濬原洞原濬  
字發之居家以孝友聞弱冠遊太學以時事多隱憂遂告

歸生平簡澹喜吟咏寡交遊時或正冠危坐人語以世法  
機事輒笑不解謂何無少長貴賤皆推誠心待之里閭敬  
爲天民原洞字開之少爲諸生詩文有奇氣當郊圍多故  
嘗慷慨悲歌慕古人以身殉國之義庚午身捍危城出金  
犒師知不可支乃爲忠國論一篇置懷中赴闕而死事聞  
祠祀後十五年原濬乃盡棄其田宅與其子鼎業避地之  
河朔林慮間復南渡河之鄆陵轉入嵩少山中十餘年而  
卒鼎業扶柩反葬于釣臺先生之墓側人謂韓氏其先有  
燕山竇氏之風御史有疏太傅之節次君有先軫之烈而  
永平府志

卷之十九

里

長君有管寧之操無忝盧龍世族云

韓應奎號東軒御史季弟爲童子時饁田之暇苦志讀書  
廿歲卽登庚午榜五試南宮始謁選得華陰知縣有惠政  
至今華人頌之歷蓬萊樂安溫三縣皆以治績聞年未衰  
卽歸田常以睦族濟人爲念絕不一干有司歲大凶施粥  
賑饑給裘禦寒邑人德之二子長原濟佃僮不羣仲原潔  
篤信秉禮並諸生濟子乾業潔子坤業庚午兵變長與仲  
偕亡仲妻王氏不避凶穢尋夫屍得之積骸中欲枕屍而  
死姑徐氏謂曰爾死置三歲孤何地王氏乃勉從逾兩月

又生遺腹泰業苦節教成

馮時泰字虞廷山海衛人幼敏學寒暑不輟登萬曆庚辰進士授工部郎中管節慎庫自能握筭覈積弊著聲曹署陞遼東廣寧叅議守正不阿冰蘖矢操築造臺堡大定老軍凡數十處無不竭盡心力邊警帥不用命失事時泰奉勘略無纖隱致忤當事坐譴或以苞苴請時泰徐應曰吾涖官惟清慎二字可揭天日况君父之事烏容規避絕不爲辭尋被逮遠民無不稱冤欲詣闕號鳴總督顧養謙止之乃極爲辯雪有并禡臣職以辨其有功無罪等語具載

永平府志

卷之十九

聖

疏中趙相志臯張相位石司馬星皆交章激切力諍竟不白時泰嘗自嘆曰由來直道忤當權過貶潮陽路八千一掬忠肝天所鑒幾回血淚洒蠻煙亡何抱鬱終

王從政山海人由明經任萊陽知縣多善政被誣萊民代爲申辯未白後其子以死疏救得免居鄉稱孝舉鄉飲白鑰東勝衛人少穎慧爲郡諸生居家孝弟事兄如父嫂如母由國學選南錦衣幕官遷汶上丞執陳友寬等大盜置之法鋤醜植良百姓德之無何挂冠世高其恬退處鄉恂恂課三子寒暑弗輟長珩季璞皆廩生仲瑜登萬曆乙

未進士選庶吉士歷刑部尙書

石璞灤州人賦性醇厚立心寬和人有急難多方以周恤之而毫無德色推誠布公不吝不爭每以棲畝之餘割其隣族牛豕犯田者飽飼歸之詩書訓後昆桑間自樂有先民矩矱焉以子維嶽貴贈中憲大夫孫申貴晉通議大夫少冢宰

王克勤灤州庠生事繼母以孝聞萬曆十三年學按兩臺會獎

穆思文山海庠生事繼母盡孝有二弟俱繼母出財產必

永平府志

卷之十九

四

均後二弟家窘又爲弟之子給產婚娶督學汪公應元疏請建孝義坊

王士倜山海庠生敦朴謹慎天性孝友父從政知山東萊陽縣以持正忤當事被誣繫獄倜偕弟偉搥登聞鼓刎頸力救卒白父寃

高第字登之灤州人登萬曆己丑進士初令臨潁徵賦不拆封卽以原櫃解府力絕耗羨歲大歉賑粥療醫活數萬人轉戶曹權濟墅關舊例支河設繩防貨舟瀾出第曰但鑲正關衣帶水足矣何淵察爲一切報罷陞大同守捐俸

贖補宗祿三千金歷楚秦藩臬擢御史中丞巡撫大同費  
橐七千金助給撫賞壽陞兵部尙書時魏崔黨熾璫以提  
督郭欽求加都督同知叅將梁甫求陞總兵矯中旨特授  
第皆不應揚左被逮榜掠甚慘第經筵力陳黨錮宜釋忠  
賢怒嗾熹宗召對切責之會寧遠警遂出第經略薊遼拜  
命隨檄道鎮堅壁清野固守而崔呈秀銜前恨劾第不發  
兵爲怯勒令閑住崇禎初年詔復原官因己巳郡城陷復  
謫居無棣己卯放還歸里建白雲樓爲東山之墅平生湛  
于理學所著有太極良知等說撫雲疏稿籟真等集享年  
永平府志

卷之十九

聖

八十二

任自永遷安人三歲孤母郭氏年二十五孀居永自幼事  
母至孝至七十六歲壽終永哀毀踰禮旣殯廬于墓朝夕  
哭奠三年如一日

白瑜東勝衛人少英敏博學善詞賦登萬曆乙未進士授  
庶吉士除刑科給事中上疏請革煤稅降湖廣按察司照  
磨起歷通政使刑部左侍郎居鄉和雅卒贈刑部尙書  
李應奎興州衛人由明經授扶溝訓值大旱藉奎積誠祈  
雨立應扶邑立石紀之陞歷城諭適縣令欲于先師殿

坐困收糧奎不許令固不從因嘆曰微末一官職不容寸  
尚可戀升斗昧吾心乎毅然掛冠歸年近九旬邑侯張公  
九三素仰奎訓扶名歲時存問數舉鄉賓且念其貧而無  
後欲爲贍後計乃笑曰清苦一生將就木矣昔聞仲叔不  
以口腹累安邑吾豈以後事累令支乎不通片楮奎初受  
麟經傳於邑侯白公夏至今遷邑業春秋者皆其遺也

馮斗華字應垣灤州人萬曆丁酉舉人任長山令政尙簡  
約公餘與學博諸生橫經問字句公文者相望以清直忤  
直指罷歸讀書不置所著有經書解義平平言二集以子  
永平府志

卷之十九

巽

運泰貴累封大中大夫太僕卿

張國祥昌黎人幼失怙恃父昂上元主簿歿遺妾王氏年  
十九砥節苦守祥長奉事如禮師邑侯孟秋講學力行不  
倦後師楊公啓元悟羅近谿性命宗旨由明經任豐潤訓  
以身率士士風丕變建魁星樓以培風氣豐庠科甲自此  
盛焉陞渭源令甦驛弊減雜徭除奸保良罷民再起有番  
里曰南川不習文教祥擇其子弟朱際昌勸課讀書力薦  
入泮以鼓吹送歸里中番人聚觀者塞山野文教以興及  
解綬歸囊無長物惟以琴書自娛耕讀課子邑大夫及鄉

里推重之尊爲模範數舉鄉賓

薛三桂盧龍人萬曆庚子舉人雲南永寧州知州遭奢酋之變死難贈按察司僉事

趙養蔚字青城灤州人萬曆庚子舉人少負經濟略富甲平灤已已戒嚴蔚捐貲建城內外炮臺造鏡礮數百位募丁守城費以數萬計時士紳多竄逸獨蔚守孤城矢死勿移傾竭家財犒援師介馬謁樞輔於關門請兵恢復事聞授中書舍人加職方主事以未通籍不肯受官疏請里居大修城池禦侮之具遠近倚重惜年僅六旬卒贈尚寶卿

永平府志

卷之十九

七

韓原善字繼之別號鵬南父應箕字希臯御史之次弟也負文武才兼精騎射倜儻尚誼有古劍客風嘗出兩嬰孺于劇盜手凡疎族貧交待以舉火者恒數十人有負債貧者焚券不復索構宗祠修世墓繕義塾動費不貲無幾微恹色以明經入對大廷念陪次暮年直推遜之後膺貢竟不仕原善生而穎悟沉酣經史旁及青鳥黃石竒門遁甲諸書靡不研究慨然有澄清天下之志登萬曆丁未進士授青浦知縣吳淞久塞震澤澱湖之水合流東下民苦昏墊爲請賑請蠲請平糴請設粥糜不遺餘力而躬行給散

卒事無譁者他如裁公正均荒絕開津貼甦塘夫清漕兌無不懇惻周至邑人尸祝之調繁長洲爲吳郡首邑賦役甲天下又當水陸之衝治之獨遊必有餘縣田一百二十二萬三千畝自勅立官甲政在鄉紳詭計花分民戶坐困巡撫徐公請均之原善身任怨勞按畝科差增役田三萬一千四百七十頃精于造士是歲中鄉闈者十人五年考最稱廉治窩訪觸忌僅遷戶部郎在縣時父嘗斥產貽之佐廉及轉戶曹父益喜爲能不瘠民以媚當道也旋丁外艱服闋補兵部東事方棘以不次推開元兵備拜命疏陳

方略八款又言召募有六難有四易疏入上遂俞發帑金七萬四千抵關門五十日募官兵一千六百餘名馬六百五十餘騎甫出關而開元報陷乃兼程趨至廣寧先是全遼軍需仰給海運萊津歲運二十萬卸三犍牛地距遼六百餘里水陸煩費原善冒雪行至海上經畫以登萊海蓋兩道累年會議不決者定泊蓋套歲節費數千金不匝月而完糧二十二萬丁母艱歸累薦不起卒原善生平孝友性豪爽有遠略周人之急有如其身所著詩文八卷奏疏二卷尺牘四卷六壬指掌二卷仲兄原性廩生有學行喜



獎拔後進千里之內負笈從遊者甚衆庚午守榛子鎮不屈死長兄原道弟原德並以文學稱早世子廣業弘業陳王庭字心龍盧龍衛人登萬曆丁未進士歷太僕寺卿寬厚清謹天啓中矢貞不附魏璫先嘗巡按遼東得將士心遽失收養全活甚多庚午城陷王庭服董幾死復甦爲黃冠後大帥如祖大壽張存仁輩皆伏拜牀下報德恐後事平論者議其不死逮獄絕粒而殞耿耿之忠堪質神明論之者亦刻矣

詹廷字忠卿號紹山尚書榮之孫由諸生補廕筮南通政永平府志

卷之十九

兗

幕以吏才著陞順天別駕廉能有聲陞南北部主事遷本部郎中陞廣南太守時奢酋叛滇南一帶搖動廷赴任被圍賊脅降至再誓以全家殉賊揣廷志不奪稍縱閱月得乘間出遂達省備陳賊形及守禦之策捐俸以助軍需二載多善政除蠹愛民寬猛適濟奏最之日輿疾歸廣南士民爭負土祠祀

張詩字子言別號崑崙山人盧龍衛民李氏子十歲避僉丁隨父母逃京師衡州同知張公抱以爲子張歿後訪盧龍得諸從兄弟哭諸祖父墓衡州卒乏嗣仍子之學文于

呂涇野學詩于何大復徧遊天下名勝仍旋京師所居種竹風雪飄蕭饒有佳致詩狀貌巉巖鬚髯如戟時以燕山豪士稱之所著有罵鬼詰髮笑琳七子等文曼衍竒譎草行狂放李中麓戲云君書揭壁不獨警人亦可驅鬼也岳氏雨華編以崑崙爲首詩文多不載

張聯奎字煒含灤州人萬曆己酉舉人除彰德司理有張佛之頌以直忤左遷秦臬幕署商州輯流亡多善政尋復理臨洮閱河西五鎮活楊弁孥累百口臨鞏帥以暮金三百餉却之再餽珠簾庭責其役而揮去曰奈何免我邀單

永平府志

卷之十九

五

恩贈父如其官以邊才擢慶陽郡守流賊寇城單騎諭禍福輒解散因積勞謝病歸僑寓邢臺時給諫馮公可賓及臺中交薦不赴邢破配田氏不屈遂遇害奎困頓旋里環堵蕭然啣杯嘯歌晏如也年六十有九無疾卒遺橐錢不滿百士論賢之

石維嶽字五峯灤州人登萬曆庚戌進士筮中牟令以坦直拂相國謫河東鹽運司知事相國卒事乃白擢推官陞刑部主事歷郎中時魏璫焰烈奪戚畹李承恩園置之獄法司希魏意擬辟嶽抗言曰殺人媚人當何律卒以園歸

李出守懷慶建告帝堂凡晝行事錄卷焚之韓昌黎裔有  
在懷者式微訪得之復其業爲建祠置奉祀生旣而瑞祠  
遍天下懷人以請獄曰俟我去若輩自爲之以故瑞敗懷  
獨無逆祠遷長沙副使岷王妃奏王被弑狀下兩臺訊獄  
廉實如妃言請治逆狀奸闖領宮金賄當事開豁上遣都  
尉大臣始鞠實逮撫按以下十九人事具后妃卷甚悉崔  
呈秀爲魏璫義子嶽以妃事觸怒且群小嫉之因媒孽戍  
薊州妃特疏昭雪嶽終不自明年七十餘卒

郭鞏字德固號金谿遷安人登萬曆癸丑進士性剛介甘  
永平府志

卷之十九

五

澹泊筮仕行人考選給事中凡封疆大事劾奸斥佞不避  
權貴侃侃直陳值魏璫用事告歸杜門謝客屢起太僕太  
常兵部左右侍郎凡七召俱以病固辭疏云臣之病不在  
四肢而在腹心微詞規諷忠愛彌篤居鄉雍睦卽野老村  
夫莫不敬而懷之

劉廷宣字化卿號方壺晚號木庵山海衛人登萬曆癸丑  
進士丰神清穎廉直謹飭筮仕儀封勵學校恤鰥寡課農  
桑勸孝弟河汜淪治之獲名田幾萬畝民賴以蘇徵賦絕  
耗羨訟俱自拘不判贖設保甲法萑苻克靖革一切無名

科派省民鋸不下巨萬擢浙江道御史彈章不避中貴劾魏忠賢蠹國十四款章由通政霍惟華與有年誼對使焚云何爲起此大釁廷宣不先楊左而摧虎喙者幾希耳巡按陝西未復命轉爲大理丞假歸未半載尋因母老請終養以大理寺少卿歸甲戌六月病卒

程蓄德盧龍人剛正有執持以明經爲嵩縣訓導轉藁城教諭不責贅儀士敬憚之

劉景周字憲之盧龍人邑庠生有孝行性沉靜博研今古手著易義心解三卷併編族譜家訓刻儉約說數千言

永平府志

卷之十九

五

白廷魁字復古號雪軒灤州人由明經任臨縣令出供具學宮月再課士歲以爲常催科不擾訟獄者理而遣之不責贖鍰時稅桑田助耕歛以不善俯仰中忌調簡遂拂衣歸與同志論文以壽終

王調元字燮伯號和陽撫寧人少孤奉母王氏至孝年十七爲諸生嘗讀書僧舍雜鐘魚梵唄間二十年如一日萬曆戊午舉鄉薦謁臺使劉公臚母守節撫孤狀疏奏奉旌因母老仕嵩縣諭倣胡安定教士法與諸生相切劘有勢家僕辱士元不畏強禦力培士氣陞臨朐令時流寇犯河

南朝議以修城垣練鄉勇爲守令殿最胸城故版築地高無水屢閉鱗次附女牆而居者千餘家令下之日元曰賊遠在二千里外先使吾民婦子露處失業是人心先自解也值憲司單騎來視高墉屹屹守禦之具纖悉畢備深歎其言爲是調知滕縣先是妖賊徐鴻儒之亂滕人死者無算又地鄰曹濮多推埋探丸之盜元令嚴法治有犯必誅於是奸盜屏息境內肅然亡何以勳直罷歸家居三十年未嘗一履公庭故人在銓部招之不往又屬臺使起之堅以疾辭生平重然諾不以生死盛衰變易年八十有五卒

少宰石公申儀部余公一元表誌其墓

李國梁山海衛指揮體貌豐偉膂力絕倫從杜將軍松渾河大戰没于陣以功加陞都指揮僉事

高如嵩東勝衛千戶萬曆中任石門路千總時泰寧寇花塲峪佯令數騎誘戰主將輕出敵伏起一軍覆没將竄山巔林莽間嵩奮殺出圍力鬪出入陣中者三敵攢射落馬剖其心而死事聞贈加二級世襲指揮同知

馮運泰字六符斗華長子萬曆己未進士弱冠登賢書聲譽藉甚事繼母以孝聞尤篤友愛令堂邑聊城以和靜豈

弟爲治恤民造士兩邑于尸祝之陞工部郎監修三殿綜覈勤密省帑金數萬兩叙功擢太僕卿假歸省視以違限奪官未究大用時論惜之

陳三緯字泰華灤州人以明經除修武丞精毅廉潔弗染習汚遷鎮原令漢史高平第一壘也荒僻特甚撫恤瘡痍捐俸薪代完逋賦請告歸里解橐助城工行誼咸推長者楊有成撫寧庠生八歲喪父已知哀毀及母有疾湯藥親奉卒之日漿水不忍入口及葬廬墓側茹蔬啜粥負土築墳日三哭奠歷寒暑不輟卽邊警亦不少動舊有枯松復永平府志

卷之十九

五

活禽鳥棲巢于上相依人皆謂純孝所致

袁卉撫寧人素敦孝行母蚤逝及父歿廬于墓側三年蛇馴蓐次地忽湧泉足徵孝感

崔赴闈字名臚廬龍庠生博學善屬文小試屢冠軍以軀幹豐偉號舍不能容遂絕意仕進性好周卹尤愛惜文士族孫及第家貧力學赴闈閱其文許必售天啓甲子錄科得路費八金及第利爲卒歲計欲不往赴闈力勸之更予八金且予黍二石曰速釀酒以宴賀客果登鄉薦乙丑捷南宮兄之孫啓亨少孤收養之爲擇師教訓是歲亦列賢

書遷安郭鞏貧甚衣履弗完延之家給衣食且授以成弘正法鞏遂早捷由給諫晉少司馬嘗予告歸來謁留之飯粗糲不異昔時鞏歡然語人曰吾師以古人待我矣因乏嗣子弟之子然弗材是時年已古稀又病足痿鞏肩輿逆致其家察精神猶健勸納繼室笑曰世豈有七十翁婿人者乎不許然鞏已密聘王氏室女至期大驚辭之不能遂合卺焉生子巍及卒時巍甫六歲

崔啓亨字建初盧龍人少孤撫於族祖赴闈家膺恩貢入成均與金正希友善天啓甲子同舉於鄉庚午

永平府志

卷之十九

五

大清兵入郡城時

太宗皇帝延攬賢才聞啓亨名大索獲之授灤州牧啓亨堅辭求死

太宗不殺罰以乳酒十巨觥啓亨性不善飲至是連舉而盡之醉幾死次日披刺以逃後不知所終

倫之楷字百式灤州人天啓丁卯舉人夙負經濟有應變才知榮穎時值大盜號一條龍者垂願穎邑糾衆圍城年餘百計攻擊楷應有餘力乘夜馳出奇兵盡殲其醜叙功以卓異召對平臺擢御史奉命巡漕擒大蠹以清漕政鬚

髮爲白劾逆帥懦撫論陳啓新以上書倖得給諫直聲震  
殿陛以丁艱歸臺使屢薦不起

張汝賢字景宣灤州人天啓丁卯舉人仕定陶令清廉愛  
民事至立斷時羣賊蜂起賢不動聲色密計招誘得通巢  
穴擒獲渠魁李之茂等四境肅清擢鞏昌郡丞值流寇攻  
城畫戰守奇策懋著軍功且賑饑掩骼惠政累累陞臨洮  
知府遷莊浪道以勞瘁乞休歸里年七十二卒祀鄉賢

鄭卿字省吾灤州人由貢筮仕河南府判清慎自持有懸  
魚酌水之風衙齋聞寂與名彥彈琴賦詩抗疏歸里力辭

永平府志

卷之十九

五

聘徵著省吾詩文集

翟凌雲字崑瀛撫寧人由明經授肥城令不畏權勢除巨  
奸大蠹擢兗州同知濟河有功省帑銀四十萬爲共事者  
所忌罷歸林下三十餘年闔門養重稱鄉望焉

龍呈圖昌黎人積學富文天資和厚由明經任鄧州佐陞  
山東都司經歷廉靜有聲解組歸崇禎庚午捐資鼓衆登  
城守禦以功加四品服授中憲大夫

穆大任山海庠生至性純篤父蚤逝事母以孝聞母歿躬  
廬墓側值兵變鄉人居村落者皆入城避亂大任獨守墓



不忍去

鄭中選字佐明始祖甫智以御史直諫謫灤州因著籍焉天性純孝不冠幘弗敢見父母遭喪哀毀盡禮以孝誼徵辟遷文登令清介自矢士民繪屏尸祝失上官意罷歸居鄉力行善事至今稱之

蔣盛韓瑛楊騰俱遷安庠生各以廬墓奉旌

張廷佐遷安庠生性至孝父疾不解衣帶者五旬餘又失明佐禱神以舌舐之愈及歿夜依柩側風雨不避奉母終身孝養彌至

永平府志

卷之十九

七

孫國賢撫寧人以廬墓奉旌

邊萬里山海衛百戶以都司管中軍事崇禎己巳入衛京師行至薊州五里橋敵兵掩至據橋大戰自未至酉身被重圍力戰死

高應辰字欽明尙書第仲子不敢以貴介忤物讀書莫測其蘊以官生任戶部照磨督犒援兵城下椎牛割羊乾餼芻茭一手拮据勞瘁骨立值父喪痛躄奔赴逮塋嘔血數升三月而卒鄉里哀之

焦慶延盧龍衛人由世胄任居庸叅將操守廉介居官嘗

買田自給事母極盡子道兵備道張公春恒稱之曰武將  
若慶延何愁不得將士心耶歷任三屯副總兵稱廉孝將  
軍庚午閒住戰死陣間贈光祿大夫驃騎將軍勅祀武廟  
表忠祠

廖汝欽字寅所中書舍人楊爾俊汝寧通判陳靖華東勝  
衛指揮張國翰東勝左衛指揮僉事以及城守中軍房應  
祥忠武營千總牛星耀仇耀光城守千總卜小峯梁壯威  
胡承祚張學閔石可玩生員韓原洞馮繼京弟聯京周祚  
新羅世傑並弟竣塚圻胡登龍並子光奎田種玉子福元  
永平府志

卷之十九

五

侄士儁李光春丁應掄李文燦胡起鴻劉可足武生張鴻  
鸞醫官陸橋郡民李應陽張俊郭重光張宗仁張禮李大  
敬張尚義傅守望俱庚午死難詳載盧龍縣志勅祀表忠  
祠

呂鳴雲山海衛人孝廉鳴夏之弟武健材勇以守備爲揚  
武營中軍庚午守郡城戰死追贈遊擊將軍

楊開泰山海衛百戶郡城失守泰以本路把總率兵偵探  
至榆關西遇敵對射死之

楊廷棟山海衛百戶少以勇力稱爲揚武營千總郡城破

奮擊死之

張汝恭灤州廩生庚午州城陷死難祀表忠祠

高應見遷安人庚午兵變飲毒而死督撫彙題旌表

蔡國勳山海衛千戶率兵恢復遵化偵探遇敵奮勇直前  
戰歿于陣閣部孫承宗題卹贈指揮僉事

嚴大寬山海衛千戶從總兵趙率教應援遵化中途遇敵  
衆潰大寬力戰不退死之

周昌會李崇樂張三張守霜劉極楊狗子鄭應秋丘小月  
洪保兒馬九哥孟之奎張福兒孫鳴海于守道趙世祥高

永平府志

卷之十九

五九

聲駿卜云吉郭來貴張友貴鍾五兒翟三龔自學李蕃枝  
單應武朱可昌梁民樂于守通梁世文王六兒劉君福孫  
二三孫來哥王國臣李思謙張六指郭得哥于大才王六周  
德純齊福拽梯郎君失其姓名並昌黎人崇禎庚午守城  
死事俱有祠今圯巡撫楊嗣昌檄縣略云本院經過昌黎  
見一城斗大前被重圍鄉紳士民抗節堅守卒挫并攻之  
銳竟成不拔之功憑軾低徊肅然起敬聞其時守梁鄉兵  
有力戰而死者骨雖朽矣生氣不磨可令泯泯無聞不爲  
來者勸乎令刊石豎碑有司春秋蜡祭爲之位而祝以辭

俾萬世而下知其爲國殤也詳載昌黎縣志

萬人傑昌黎人孝謹端方爲諸生卽以廉節自飭庚午之役煮粥賑濟輸金供費晝夜禦守不避矢石由明經任祁州訓值大兵攻祁傑率衆力守卒獲保全以性不善阿當道忌之故功不及錄祁之士民至今頌其德焉祀府庠楊呈芳字桂林山海衛人由明經授魯山令居官平易時土寇蜂起與衙胥結通芳知事不克濟冠帶坐堂上賊環侍不忍加害出入數次始戕之爲具棺殮後其弟徃收其屍經年啓視面貌如生事聞贈汝州知州

永平府志

卷之十九

卒

樂東龍字雲從山海衛人由明經三任廣文所在教法嚴整人欽模範陞平陽郡丞致政歸儉素自守時以方正長者稱之

徐應登字子科撫寧人敦行孝友不昧孤侄遺金鄉黨推重以明經授真定廣文教人先德行而後文藝弟子佩服不諠

蕭竒棟號擎元撫寧人由恩貢任蒲令時流寇猖獗民不聊生棟多方撫循悉備戰守之具百姓恃以安輯一時戴之尋陞南陽府同知卒于官

王之葵撫寧人由明經任徐州判智明胆決不肯阿狗當流寇之亂州牧自焚葵亦堅求自盡士民力救得免以徐水陸要衝憲司勉以代篆視事三載撫恤瘡痍安輯流離民得復業一時賴之

馮運隆字翊明灤州人由明經任河間訓壬午冬流寇至隆守陴力戰城陷不屈死

王際明撫寧人秉性剛直言行不苟由明經任清河學博陞沔縣令未半月遭防兵通寇夜襲破城士民驚散明執鐵鎗率家僮對敵賊多有中傷者明爲亂矢所困猶血戰永平府志

卷之十九

空

不屈賊懼乃却尋復挾忿糾黨嚴攻七月不下積勞成疾告休還里路經臨清之變誓不倖生登樓自焚山左撫按以臨難不苟於逆旅交章入告部覆方下闖賊陷京未沾卹典人至今痛之

王之心字鑑吾灤州人司禮監太監博學精翰墨監督薊永力杜餽遺免文吏庭謁崇禎甲申都城陷心同御馬監太監王承恩侍帝縊于煤山一時稱兩中貴殉義心弟之仁任蘇州總兵洪光元年率所部入海見事不成復登岸詣督師洪公請死曰某海中自裁人未我知特來求明白

死耳從容就刑可謂兄弟合節矣

程繼賢號敬庵山海衛人由貢監初授中書舍人歷尙寶司卿封朝議大夫賢事親不諉諸兄父百歲具奏建坊完兄產撫兄子時以孝弟稱且敦篤友誼生死不渝請除催頭之弊功在梓里年踰七旬居鄉謙抑甲申守官都門不臣逆闖捶幾死僑寓天津土寇忽起賢獨不屈竟遇害國朝順治庚子本衛士民公請入祀鄉賢

永平府志卷之十九終

永平府志

卷之十九

奎

